

L'URB reducescha ils inscuters ad Oerlikon

Radunanza generala a Turitg

■ (anr/vi) **Las activitads principalas da l'URB sa concentreschan cunzunt sin ils inscuters ad Oerlikon e sin l'ediziun dal fegliet. L'uniun n'ha dentant betg avunda daners per finanziar tants inscuters sco fin qua. La radunanza annuala ha già lieu la sonda passada a Turitg.**

Dapi circa dus onns envida l'Uniun dals Rumantschs da la Bassa (URB) regularmain ad inscuters en la Giesserei ad Oerlikon. Mintga giada vegn preschentà in giast spezial e purschì musica. Al proxim inscuter, ils 5 da zercladur a las 19.00 han ins la chaschun d'emprender d'enconuscher l'autura *Angelika Overath* e da tadlar la musicista e chantautura *Lisa Dermont*.

Damain inscuters pervi dals custs

En sasez tira il president *Jon Carl Tall* ina bilantscha positiva da quests inscuters. Tut tenor tge giast ch'ins preschentia cuntanschian ins ina buna participaziun. L'uniun haja uschia la chaschun da gudagnar novs commembers. Ma pervi dals custs veglia l'URB organisar en l'avegnir be pli quatter occurrenzas ad onn.

In auter accent è il fegliet che l'uniun distribuescha a ses commembers. Il fegliet cuntogna las datas d'occurrenzas rumantschas, pliras contribuziuns curtas e mintgamai in'intervista pli gronda. En il numer dal matg ha il redactor *Ciril Berther* interrogà *Corsin Bisaz* dal center per democrazia ad Aarau. Abunar il fegliet pon era personas interessadas d'ordaifer l'uniun.

Il fegliet porscha er in aspect educativ, numnadamain ina glista da plects

rumantschs en mintga idiom. L'ultima glista è sa fatschentada cun expressiuns dal velo sco per exempel: tracziun, surdina, radi, fis, girs, portabagascha. L'idea saja ch'ils Rumantschs emprendian meglier rumantsch, ha remartgà Berther.

Reelecziuns e quint

La radunanza ha reelegì la suprastanza ed approvà il quint. A partir da quest onn surpiglia *Simona Cajacob*, responsabla per projects tar la Lia Rumantscha, tschertas lavurs. Planisà è per exempel ina survista cumpletta ed actuala dals curs da rumantsch e da magisters che san dar curs u uras privatas. L'URB survegnia adina puspè dumondas da personas che lessan emprender rumantsch, ha ditg Jon Carl Tall. I na saja betg uschè simpel da mintgamai pudair inditgar in magister u ina magistra che instrueschia il dretg idiom en la regiun giavischada.

Il 2013 ha l'URB dà ora radund 18 000 francs ed incassà 13 700 francs. Da quai resulta ina sperdita da 4300 francs uschia che la facultad sa sminuescha la fin dal 2013 sin 13 500 francs.

Las entradas da l'uniun derivan oravant tut dals commembers (8100 francs) e da la Lia Rumantscha (5000 francs). La gronda part da las expensas han ins impundì per ils inscuters. Pli navant sustegna l'URB singuls concerts, disc cumpacts rumantschs u publicaziuns.

Suenter la radunanza ha referì *Johannes Flury*, rector da la Scol'auta da pedagogia a Cuir.

Dapi infurmaziuns: www.uniun-urb.ch